

16 OCT 1996

Abdullah-Kamil (bergambar)

KAMIL KSU PALING DISAYANGI, KATA ABDULLAH

KUALA LUMPUR, 16 Okt (Bernama) -- Menteri Luar Datuk Abdullah Ahmad Badawi menyifatkan bekas Ketua Setiausaha Kementerian Luar Negeri, Tan Sri Ahmad Kamil Jaafar sebagai seorang KSU yang disayangi dan seorang diplomat berwibawa.

"Penghargaan yang diberikan oleh Perdana Menteri Datuk Seri Dr Mahathir Mohamad ketika menggulung perbahasan pada Perhimpunan Agung Umno Sabtu lepas merupakan satu penghormatan dan sanjungan paling tinggi pernah diberi kepada pegawai Wisma Putra oleh seorang Ketua Kerajaan," katanya.

Beliau berucap pada majlis meraikan Ahmad Kamil yang bersara setelah berkhidmat selama 34 tahun dengan Kementerian Luar di sini malam ini yang turut dihadiri Dr Mahathir dan isterinya Datin Seri Dr Siti Hasmah Mohamad Ali.

Abdullah juga berkata hubungan kerjanya dengan Ahmad Kamil sentiasa baik dan erat dan beliau menghargai Ahmad Kamil yang sentiasa sedia memberikan tunjuk ajar dan bantuan bila diperlukan.

"Berdasarkan kepada kehandalannya sebagai seorang diplomat yang terkenal di seluruh dunia maka Dr Mahathir melanjutkan khidmatnya selama dua kali dan kali ini melantik beliau sebagai Perutusan Khas Perdana Menteri," katanya.

Abdullah berkata sepanjang perkenalannya dengan Ahmad Kamil sejak dari bangku sekolah, beliau mengenalinya sebagai seorang yang kuat bekerja dan makanan yang paling digemarinya ialah otak lembu.

"Kalau makan otak lembu tidak kurang tiga pinggan, mujurlah otak lembu itu tidak berjangkit kepadanya. Jika tidak kacau dasar luar negeri kita," katanya.

Dalam ucapannya pula, Ahmad Kamil berkata diplomat muda perlu mempunyai unsur-unsur dinamisme dan keyakinan diri untuk membolehkan mereka berdiri sama tinggi dengan perwakilan negara lain.

Beliau berkata pendekatan Dr Mahathir yang agresif dan pragmatik berhubung dasar luar negara membolehkan Malaysia memainkan peranan berkesan dalam hubungan luar. -- BERNAMA

ZAB MAI